

四庫全書

史部

欽定四庫全書

平定兩金川方略卷一百二十九

十一月壬辰明亮舒常奏言

臣

等於阿爾古巴布

里適中之地拏柵前進以便乘虛襲取礮占遂定
於初五日進攻查礮占向南一路山梁有山峰七
處地名克爾甲爾古其上共有五礮連築石卡接
應向東地名日格德木牛復有兩礮當派令德赫布

都爾嘉噶塔布教成等分為七隊進攻向東二段

山梁之上地名曰蓋古洛山勢尤險且堅礪林立
恐賊人知覺預為準備當派奎林和隆武等亦分
隊繞出克爾甲爾古之後猝往進攻自克爾甲爾
古以至日蓋古洛相距約有二十餘里尚須踰越
兩重山峯兩道山溝其中間一山峯地名格爾那
古另派善射之索倫吉林兵丁先行佔據使賊人
首尾不能相顧並於阿爾古派令董果等帶兵牽
綴臣等督同興兆舒景安在巴扎木帶領官兵為

各路照應是日丑刻克爾甲爾古所列碉卡官兵
一擁而進賊不能支旋即竄入日格德木牛兩碉
之內并力相距臣等公同商酌此兩碉勢在必得
賊人不過因官兵現已合圍逃遁在此為困獸猶
鬪之計不若派兵四面埋伏稍緩其攻賊必乘空
共尋出路因其走而擊之更易擒殺至是晚將及
夜半賊果紛紛棄碉四散而我兵喊聲並起賊人
倉皇無措束手就戮得脫者甚少查克爾甲爾古

及日格德木牛為礮占第一層門戶今已克取賊
斷不能久支現擬逐段接拏木柵將官兵屯駐庶
就近攻取較為省力況由阿爾古沿河取道進攻
路段亦多非扎烏古陡險可比臣等即在此數日
內察看機宜以期往無不利再扎烏古之下與勒
烏圍對河現在趕搭索橋派兵一百八十名在彼
駐劄修理奏入

上諭軍機大臣曰明亮等奏自礮占進兵攻得克爾甲

爾古日格德木牛兩處碉卡現擬接拏木柵就近攻
打日蓋古洛相機深入所辦甚好若能乘勢壓下攻
克乃當掃蕩甲雜則河西一帶即可廓清且破其狡
窟逆酋更無處竄逸佇聽捷音至前此額森特駐守
勒烏圍於堵禦河西及科布曲一帶之賊責任甚重
今額森特隨阿桂等進兵勒烏圍惟留五岱富興等
看守富興本係病軀難以策其出力即五岱計畫調
度亦未必及額森特之優現在阿桂軍營不但海蘭

察勇畧超羣其餘領隊大臣侍衛內能帶兵勇往者甚多可無藉額森特一人隨同進剿著傳諭阿桂即令額森特仍回勒烏圍駐守嚴切防禦勿使河西之賊得以偷越設稍有疎虞惟額森特是問

同日劉秉恬奏言現在西路軍營自薩拉至勒烏圍等處截至閏十月下旬存米八萬四千餘石北路軍營自薩爾赤至木池等處亦約有存米二萬石統計兩路軍營及附近各站共有存米十萬石

以米數合計支食之數儘可敷兩路官兵人等三月之糧嗣後每日只須從容運供源源接濟餽餉自可充裕况指日大功告成尚有應辦善後事宜將來駐兵添設營汛臣揆度地勢情形不外美諾底木達大板昭勒烏圍噶喇依等數處除將資哩舊存之糧就近運赴美諾等處外如現在薩拉大板昭存貯之米可即由瑪爾當一路撥運底木達其勒烏圍一帶存貯之米更可就近直運噶喇依

維時縱有存米數萬石亦可分運各處接濟兵食
更不虞其陳積無用奏入

上嘉之

丙申阿桂豐昇額海蘭察額森特奏言查西里山
腿之下舍勒固祖魯及瓦喇占二處最為扼要一
得其地則上攻科布曲山梁較易用力但西里山
梁一帶林木深幽峯巒迴合道路亦甚叢雜而安
布魯木等處至今賊尚死守必須相度緊要之處

移設營卡以資控扼始可抽出兵丁為直前攻打之計當即督令官兵將山梁緊要之地俱已佔住並將砲位運往一打瓦喇占一打舍勒固租魯查瓦喇占一處即係阿穰曲斜岔山腿之下第三處寨落其右手山坳尚有碉寨一處其內亦多賊人據守應一併轟摧攻搶而於官兵前此拏柵置砲之所相距不無稍遠即於初九日夜派令烏什哈達官達色五福等逼近碉寨連拏木柵三座並即

移砲前往轟摧其舍勒固租魯之旁有相連大寨
二處大礮一座係居舍勒固租魯及瓦喇占之中
攻得是處則進搶舍勒固租魯可免旁顧亦於初
九日派福康安泰斐英阿攻其右普爾普額爾特
等攻其左官兵奮勇前進當將一礮兩寨悉行克
獲殺賊十餘人其瓦喇占以上之寨落亦於初十
日清早派烏什哈達等督兵攻取因賊人守禦甚
嚴恐損兵力用砲趕緊連轟至十一日晚望見礮寨

已漸有孔穴候至十二日子刻乘其不意密派官兵一呼而進直至寨邊四面攀牆而入當將是寨克獲查此一帶山溝內其瓦喇占舍勒固租魯兩處賊人知我搶上科布曲山梁必由於此是以強支螳臂以冀稍緩須臾此數日雖天色甚寒到處多冰凌積雪而成功在即人人振奮自可不至稽阻惟賊番狡惡可恨見我兵將欲搶上科布曲山梁即在索隆古以下們都斯一帶運木搬石又思

添修碉卡但其地皆大砲可及之地日間屢為大
砲所斃已不能存夜間沍寒凝凍難以施力亦可
無虞其阻我前進之路至此處官兵攻打緊急則
科布曲山梁上克爾古什拉斯地方賊或不無抽
減臣豐昇額現同臣額森特復帶兵前往勒烏圍
前敵察看情形如稍有疎懈之處即相機合力攻
取奏入

上諭軍機大臣曰阿桂等派兵將舍勒固祖魯相連碉

寨悉行攻獲其瓦剌占以上之寨亦經攻得並殲戮
多人官兵自可乘勝直前搶佔科布曲山梁而豐昇
額又親往勒烏圍前路相機合力攻打所辦甚好至
們都斯一帶賊番運木搬石思添碉卡拒守實為可
恨現據阿桂用大礮轟擊賊衆自不能存亦可無虞
其阻計阿桂日內必當得手官兵若得科布曲索隆
古山梁更為得勢過此惟舍齊喇嘛寺或尚有賊抗
拒然官兵屢勝之後聲勢甚盛由彼下壓噶拉依易

如摧枯拉朽惟當努力妥辦迅奏膚功以膺茂賞

丁酉

上諭內閣曰現在大功指日告成所有撥解軍需銀兩雖已敷用但平定金川後一切善後事宜尚須經費儲備尤當寬裕著於部庫內再撥銀三百萬兩交川省藩庫存貯備用該部即遵諭行

壬寅阿桂豐昇額海蘭察額森特奏言臣等察看得雅瑪朋寨左有大寨二處名格什格章右有大

寨一處名布智章其上又有大寨四處名克巴克
占皆雅瑪朋寨所恃以自固者若得此數處併即
搶獲舍勒固租魯則不但雅瑪朋正寨其勢已孤
可以力取即其餘寨落均可迎刃而解當於十四
日夜分兵三路進攻臣海蘭察帶兵為各路策應
十五日寅刻官兵分路前進一齊攻撲其舍勒固
租魯賊人悉力放鎗滾石而官兵乘高而下直抵
寨根挖牆以入賊人不能存站當將舍勒固租魯

四寨一礮同時攻克其福康安等并克格什格章
寨落二處普爾普亦攻克布智章寨落一處共計
殺賊數十名其被鎗箭所傷捨死奔竄而去者甚
多官兵已至河沿當即拏起木柵七座繞出雅瑪
朋寨之西角一面分兵據守並用礮轟其礮寨其
瓦喇占一處經烏什哈達等拏柵近逼用礮轟摧
並於是夜督兵奮力攻獲其自瓦喇占下至河沿
剩有薩爾歪寨落三處又已移礮下轟即日相機

攻取至十六日臣等以舍勒固租魯之南尚有寨落兩處係與雅瑪朋正寨互相援應必當分兵攻取十七日黎明官兵分為六路一齊擁進普爾普三隊官兵先將舍勒固租魯之南寨落兩處圍住攻打均行奪獲其雅瑪朋正寨賊人拒守甚力尚未即克臣等遂令官兵於新得之地趕斫木柵八座并另換生力兵一千名分為四隊臣海蘭察同瑚尼爾圖等於中路埋伏普爾普等於右手埋伏

俟至戌刻各官兵潛密無聲進抵雅瑪朋寨之下
突然衝擊賊人悉力抗拒而官兵不避鎗石拋擲
火彈剗挖孔穴並趕運樹枝放火焚燒延入寨內
將賊人悉行燒斃並將附近寨落之木城四座一
併攻克臣等公同商議科思果木官寨向雖未經
攻打而此內賊人現亦必不能存立若乘勝克取
溝內賊氛即已掃盡於搶上山梁之舉更可無虞
後顧因即派額爾特帶兵沿河前進向上仰攻派

仁和等帶兵向下攻壓賊人心膽已寒一見官兵
勇猛衝進即棄科思果木官寨竄入下手平碛官
兵一面圍攻一面乘風縱火又將平碛內賊人燒
斃無一得脫其舍勒固租魯之東薩爾歪之西溝
內尚有三寨又派侍衛巴達瑪等乘勢進圍立時
克取此連日打仗共得碛寨木城五十餘處殺賊
二百餘人生擒四名查從前官兵攻得西里山腿
之後原可從沿河碛寨中間冒險穿越而過上攻

們都斯索隆古等處但此山梁上道路既多分頭
攻搶實非多兵不辦而沿河之碉寨未清則西里
達思里舍爾圖拉布勒四道山梁皆須官兵分駐
難以抽撤多兵今各寨均已廓清即可於緊要處
所酌留營卡其餘防守各兵自可儘力抽出以資
前進臣等現在趕緊攻打薩爾歪寨落以截斷勒
烏溝一帶賊人併即連夜移設營卡約計得兵五
六千人即可迅上科布曲索隆古山梁以直搗噶

拉依巢穴

同日明亮舒常奏言竊臣於十三日由碾占再行發兵以分賊勢即擬進剿阿爾古嗣據敖成報稱於是日進攻日盖古洛察看賊人仍前拒守極嚴旋即從克爾甲爾古之西通於桑染爾山梁有賊碉八座分兵攻打即時搶獲因山梁積雪甚大且離碾占寫遠即將各碉俱行折毀計碾占一路派往進攻本以試探賊中虛實以便相機籌辦臣等

隨於十七日即擬出其不意派令各領隊大臣帶
兵直取阿爾古於丑刻臣等督率前進但查阿爾
古斜坡之上山腰另有大賊卡四座其下各寨落
俱恃為照應當派和隆武珠爾格德都爾嘉德赫
布等分為四隊進攻奎林阿爾薩朗等攻取沿河
連接寨落和隆武等四路官兵已由山腰攻得大
卡即奮力下壓搶入寨內到處痛加殲戮拋入火
彈烟焰蔽天其奎林所攻之處地名絨布扎木西

南北三面俱藉高礪自固東面則靠近大河緊與科
布曲對面我兵一擁而登即將頭人僧木賴阿納
木用鎗擊斃尚有頭人日爾金朋看見合圍嚴密
即率賊衆各從碉頂跳下欲從河沿逃竄被官兵
截殺無路一齊赴水官兵乘勢砍殺直至臨河無
一得脫其科布曲山上賊人當經河東官兵助勢
牽綴用砲擊打河西賊人盡皆亂竄惟珠爾格德
都爾嘉所攻阿爾古上接巴布里溝口突起石包

地名噶爾角其上分布碉寨二十餘座聯絡一處
堅厚倍常雖被官兵圍住尚猶抵死相拒臣等令
阿爾薩朗阿蘭保帶領官兵數百前往該處協攻
亦即佔據殺賊甚多共計生擒賊番八名殲賊二
百餘名查阿爾古既已攻克已出對河科布曲之
南即於本日先運砲位將科布曲近河賊卡自對
岸轟摧甚為得力均奏入

上諭內閣曰此次兩路官兵各能爭先殺賊奮勇奪碉

賊人已失險要不難指日蕩平皆由將軍叅贊等調度有方故能動合機宜同時克捷統俟大功告成特加茂賞其阿桂一路昨已降旨查明打仗出力各項兵丁賞給一月錢糧此次明亮一路出力之滿漢屯土各兵並著照前此阿桂軍營之例一體賞給以示鼓勵

上諭軍機大臣曰阿桂等奏科思果木本係賊酋緊要官寨勢居陡險碉堅牆厚攻打較為費力今阿桂既

將舍勒固租魯等處碉寨悉行掃除並科思果木亦
即迎刃而下阿桂現已抽調防兵五六千趕緊攻打
薩爾歪寨落以截斷勒烏溝之賊即可迅上科布曲
索隆古山梁直搗噶拉依巢穴自更勢如破竹而明
亮一路亦經攻克阿爾古已出對河科布曲之南下
至臨河現即趕運大砲將對河賊卡隔岸轟摧甚為
得力是目下兩路官軍聲勢倍為壯盛看來逆酋不
過暫圖護死其手下賊番似亦不能如前此之悉力

抵禦逆酋力量更不能支大功自可速成阿桂明亮等益當努力為之指日掃穴擒渠以膺酬庸茂賞

同日鄂寶顏希深奏言大兵攻克斯底葉安日斯滿等處地方已與甲索一路官兵會合所有達爾圖得楞基木斯丹當噶等處駐防官兵現經將軍明亮等調赴新得山梁駐守其運道臺站自當相機辦理查舊站自俄坡至大營計程四站今官兵既已移駐日斯滿等處而大營現又擬移斯底葉

安若仍由舊站運供未免寫遠應請將達爾圖得
楞基木斯丹當噶三站全行裁撤改於木克爾安
設一站分運兵糧至應安人夫一項除日斯滿一
站僅係隨營收放無庸議設人夫惟木克爾一站
係分運日斯滿斯底葉安兩處軍糧應請仍安夫
三百名查現在裁撤達爾圖得楞基木斯丹當噶
三站共夫九百名除分安木克爾一站外當餘夫
六百名本應及時裁撤但木池收貯南路陸續運

到之米尚多該處額夫不敷趕運應請將前項餘
夫暫留分添木池覺木交兩站幫運存糧以期迅
速竣事一俟存米運完即行裁撤以歸節省奏入
上嘉之

十二月乙巳富德奏言臣於沿河兩岸新拏木柵
之內築起礮臺轟擊賊碉連日殲戮甚多賊人窘
迫惟藏於地溝內併力死守十一月十四日忽有
賊百餘從河邊伏行前進將至木柵經叅領舒津

太等所帶伏兵知覺放鎗聲喊奮勇抵禦舒亮帶兵五十餘名聞聲接應并力衝擊殺賊十餘名賊始逃竄伏思逆酋此時勢窮力迫不過視我兵之所向聚衆以守其餘地方想未必即無懈可乘若出其不意將卡卡角以東登牛寨礮卡前往搶佔亦可多殲賊番隨派舒津太等帶兵三百分為兩路於十五日寅刻逼近賊礮賊衆放鎗擲石我兵奮勇直衝而山梁賊衆紛紛齊來救應直至十六

日辰刻不能攻取暫行撤回現在大功將歲尤當計出萬全惟有欽遵

聖諭一面嚴飭各處堅固防守一面查看情形以便乘機進剿奏入

上諭軍機大臣曰富德奏稱遵旨嚴飭堅固防守以便乘機前進富德不以躁進失機固屬慎重但現在情形與前不同當兩路將軍兵未深入賊勢方張富德兵數無多未便輕進是以僅令堅守要隘牽綴賊勢

現今不但阿桂一路破險深入即明亮亦皆克捷前驅官兵逼近賊巢逆酋方就死之不暇又何能派兵侵我後路乎富德此時當將後路應撤之兵酌量撤出以圖進取即如穆谷等處豈非險峻難圖之地阿桂現已設法前進攻取勒烏圍與噶拉依相近明亮一路初亦難於得手而今已屢戰有功富德不乘此奮勉豈俟阿桂等攻得噶拉依時始行進兵耶富德此時發兵前進如能畧有聲勢則三路並進成功自

當愈速富德當盡力勉為之

臣等謹案用兵之道隨時制宜我

皇上前以富德一路兵力稍單飭其堅守要隘其時西北兩路官兵尚未深入自當計出萬全專意防守後路為牽綴之用茲大兵已乘勝長驅直逼噶拉依巢穴賊酋窮蹙日甚一日斷不能復圖侵軼則此時又當力圖進取無可觀望伏讀

聖明訓示炳若日星庶俾藉詞慎重守株不進者倍加

愧悚共知奮勵云

戊申阿桂豐昇額海蘭察額森特奏言查薩爾歪寨落共有三處官兵於攻克瓦喇占之後即向下接拏木柵運礮轟擊已見殘損臣等於十八日晚間分派官兵令官達色帶兵攻其左烏什哈達等帶兵攻其右臣海蘭察率同五福泰斐英阿等自上而下攻其正面但薩爾歪對河有阿結占寨落兩處既可與薩爾歪隔河應援並即在官兵搶上

山梁道路之旁若不一併掃除則尅日上攻難免
旁顧又派福康安普爾普額爾特等過河直搶各
寨十九日卯刻官兵同時並進直抵薩爾奎寨下
四面攀登賊人驚慌無措一面放鎗拋石抵敵一
面棄寨而逃經官兵預行繞出其後痛加截殺殲
賊甚多遂將薩爾奎三處碉寨佔據其隔河之阿
結占寨落兩處亦經福康安等同時力攻立即克
獲惟是官兵已從西路攻壓下至沿河今復從沿

河上攻察看科布曲索隆古山形高峻其間道路雖多碉寨亦為不少官兵分路上攻即須隨地接拿木柵以資直上山梁之頂如從前搶佔西里辦法方能得手臣等已儘力抽出兵五千有餘擬分四五路上攻現在仍於果木得克攢礮力轟明示以官兵尚欲勦洗此處而一面趕緊砍運木柵預脩齊全即於數日內發兵直上為一氣攻搶之舉至臣豐昇額額森特亦已部署官兵屆期與西里

官兵同日分攻科布曲下截山梁若乘賊首尾不能相顧竟能佔據固屬大為有益否則竭力攻打可以大分賊人之勢與搶上索隆古各處之兵亦可添助聲勢奏入

上諭軍機大臣曰阿桂一路官兵每次進攻俱能克獲碉卡擒殺賊人甚為欣慰即當鼓勵我軍乘勝直搶科布曲索隆古以便迅搗噶拉依賊巢至明亮一路其聲勢尚不如阿桂一路之奮勇直前此時賊勢日

威不特兩路將軍應同心併力務於歲內速成大功
以膺茂賞即富德亦當於此時相機進取俾在事官
兵同沾恩澤以光奏凱旌庸之典

壬子明亮舒常奏言查達撒谷之下賊人寨落四
處正當路口連日已將三處用火焚燒其正中一
寨為頭人納木基所居之地賊護守極嚴其相連
寨落雖已燒燬因去阿爾古頭敵中間隔有小河
一道且山上有賊人寨卡鎗礮可及難以留兵照

應而賊人復將破寨修整從旁堵禦此數日內於
噶爾角加緊用礮轟摧周圍牆垣俱有塌損察聽
賊人因躲避火礮在寨內聚守者甚少俱伏於兩
山左右但俟官兵前來打仗即突出救援臣等預
令和隆武挑選官兵每夜於附近守候探有可乘
即直前攻其無備至二十八日經和隆武珠爾格
德等帶兵分路一攻在旁賊卡一取正中賊寨其
賊寨上山腿尚有戰礮二座以為擁衛另派阿蘭

保等繞道而往同時並進將至卯刻卡內賊人一見官兵擁至即四散奔逃而正中寨落猶放鎗滾石迎拒官兵拋入火彈其被礮轟損之牆垣復遇火力震動立時四面塌倒賊皆俱壓斃在內並大寨之後連接四寨悉行佔據其在上第一碉亦經阿蘭保乘勢搶奪當即合攻第二碉詎各處應援賊人齊集抵死相持一時未可力勝現將所克碉寨先行派兵駐守查達撒谷山梁賊雖未城碉卡

互為聯絡然路口要隘已為我兵所據由此前驅
地方開展兵力可施惟達撒谷形勢與扎烏古相
同由角木而下分為兩條山腿現擬將官兵多分
路數盡銳以攻如搶過達撒谷頭一道山梁即由
半坡斜下直取沿河之格爾則得有進步則第二
道山梁又可攻自潰若乘勢搶佔則角木一帶
賊人必將捨之而去奏入

上諭軍機大臣曰近日明亮等連次奏報俱有克捷且

即日進攻角木等處以期掃淨河西賊境自可速冀
成功昨阿桂等奏攻克薩爾歪寨落並過河奪獲阿
結占各寨即擬搶上科布曲索隆古山梁距今又閱
數日定可得手此際如已搶佔科布曲索隆古山梁
則從上下壓直搗噶拉依便覺勢如破竹賊人斷不
能再延殘喘是以盼望阿桂等奏報尤切就現在情
形而論賊人日益窮蹙計官兵乘勝深入搗穴擒渠
自可尅期歲事

同日富勒渾郝碩奏言西路大兵現已攻克科思
果木及雅瑪朋各寨落所有西里溝底一帶地方
業與勒烏圍接通糧運道路自應隨時酌辦以期
省便查昆色爾北接沙冒碯格魯瓦覺一帶山梁
若由谷噶舊路轉運即可直達軍營比之現在色
木多一路較近數站臣等查自梭洛柏古至谷噶
原係舊定站所仍應作為站半該站現有夫一千
名無庸添設其谷噶至喇穆喇穆喇穆至格

魯瓦覺前因緊接大營限於地勢是以作為站半
及半站安設目下另立糧臺自應酌量道里遠近
均勻安設應自谷噶至得勝坡作為一站由得勝
坡至格魯瓦覺作為一站由格魯瓦覺至沙冒碓
一站即可直抵昆色爾軍營共添四站每站各安
夫一千名共應安夫四千名此項人夫即於色木
多至巴占裁撤人夫九千五百名內撥出四千名
如數添安新站實可節省人夫五千五百名一得

科布曲即由科斯果木直運動烏圍兩路總滙之所不過計程站半較之由色木多一帶供運途路既近實多節省臣等已飭色木多以前各站將存積軍糧軍火加緊僱運一面裁撤一面添安奏入上嘉之

甲寅阿桂豐昇額海蘭察額森特奏言查科布曲山腿之克爾古什拉斯一帶原係自勒烏圍前抵噶拉衣正路地當緊要凡有可上之處賊俱密排

木城礮卡一覺官兵潛上即合力放鎗滾石以為
負嵎之計至攻上科布曲索隆古等處山險林深
必如搶佔西里阿穰曲之法一氣仰攻而上至稍
可立腳處即趕拏木柵佔定方能有濟當經公同
籌議臣海蘭察帶同格勒爾德等從中路上攻福
康安瑚尼爾圖泰斐英阿等從左手上攻普爾普
額爾特等從右手上攻又派保寧仁和成德在普
爾普之右常祿保與侍衛岱三保在福康安之左

各帶兵上攻以分賊勢而烏什哈達等緊隨中路官兵接拏木柵並令五福趕運木植應用其攻克爾古什拉斯各處碉卡之兵復分為六隊臣等察看情形格隆古一處在科布曲以下勒隈勒木通克爾古什拉斯以上正居山梁中間其上有碉柵數座其旁林箐幽深山壁更為陡削賊度我兵萬萬不能至此未必嚴防若出其不意突然而上放火焚燒則山梁上下賊人慌亂於正路攻打官兵

殊為有裨但此處既不可容多人攀越而派撥之外亦更無兵可用因令海祿於大營內派出投番十七名潛往埋伏俟上下官兵舉動後突起搶殺二十七日亥刻臣海蘭察等中三隊官兵各自進發蟻附而登及至五鼓各礮卡之賊均來抗拒我兵抵冒鎗石向上力攻賊俱穿林竄入得木巴爾大礮悉力固守臣海蘭察遂將其地佔據至攻打克爾古什拉斯一路之兵特成額那木扎帶兵先

上攻克第三碉并即與書麟等合勢將峰頂兩碉及山峰西面碉卡全行克取而烏爾納亦攻克第四碉臣額森特等將山腿一帶所有碉卡同時攻克而倭昇額等繞過山背又將山後莫里雅木寨落亦俱克獲共計攻克碉卡寨柵三十餘處至所遣上格隆古之投番等於二十七日夜接踵攀越繞過礮上碉座潛伏將近黎明見山梁上下官兵均已動手隨將火彈拋入木城之內該處係賊番

存貯火藥之所一時轟發立即燬其一柵其旁兩
碇並砍門而入將碇內賊人殲戮而各處賊衆以
是處為居中扼要之地合力來援土兵等奮力衝
突而出斬獲頗多隨於佔據處所下至溝底皆已
拏柵聯絡聲勢又由普爾普佔據之地直指山梁
向上拏柵八座現在築起礮臺移礮往轟附近碇
卡查攻獲克爾古什拉斯各碇卡外順梁迤東地
名勒隈勒木通賊人尚復死守碇卡二十九日又

已攻取一碉現在移礮往轟以便相機搶佔奏入
上諭軍機大臣曰連日盼望阿桂等一路捷音甚切今
雖未能即得賊人要害山梁而旁近寨落屢有克獲
亦足剪賊番羽翼而褫其魄若能佔得科布曲及索
隆古兩處山梁便可從上下壓直勦噶拉依其勢更
易其中惟舍齊喇嘛寺賊人或尚於彼聚守然乘勝
深入軍氣奮揚彼疲殆之賊自難支禦則掃穴擒渠
諒應尅期歲事阿桂等惟當善體朕意速集大勲

平定兩金川方略卷一百二十九

欽定四庫全書

史部

平定兩金川方略卷一百三十二

給事中臣查善長覆勘

總校官原任侍講臣王燕緒

欽定四庫全書

平定兩金川方略卷一百三十

十二月庚申阿桂豐昇額海蘭察額森特奏言查
勒隈勒木通一線山脊峯巒起伏碉卡嚴密自移

礮往轟後業已克其一碉其接連賊碉又運礮加

緊推打亦稍見塌損臣豐昇額額森特即派書麟

持成額彰霽烏爾納那木扎等于初三日寅刻帶

兵分隊並進將賊碉三座四面圍定攻至卯刻賊

人猶拒守如前先是

臣

等已密派侍衛伊里布等

帶兵預行埋伏屆時即從右手下至山半復逆運
斜山繞攻第四五碉天已黎明前三碉賊人望見
心慌我兵分頭直上殺賊甚多其從碉上跳下者
又被我兵追殺並拏活口四名餘多落水淹斃遂
克其在前三碉並乘勢又克在後之兩大碉石卡
九座至得木巴爾一路初三日將運到大礮轟摧
數次

臣

海蘭察隨派官兵奮勇攻撲當將中間石

碉並附近碉座之木城一併奪取普爾普額爾特
等亦得其一碉各有殲戮現已向上接罕木柵十
數座離山梁之頂較前更近查勒隈勒木通碉卡
盡克之後官兵相拒格隆古不過中有三碉現有
潰敗賊人雖又退入碉內死力拒守但移礮往轟
不難克取至得木巴爾賊人尚恃其地形陡削鎗
礮之外推滾大石日夜拒抗但官兵設法罕柵一
上山梁之頂則已據科布曲之上而格隆古一得

又已出科布曲之後更足使其腹背受惠諒必可
克取而一得科布曲即擬直搶索隆古其得木巴
爾們都斯賊人皆拒守无益亦必不攻自潰奏入
上諭軍機大臣曰阿桂等將勒隈勒木通碉卡悉行攻
克殲賊甚多將軍及將士等並皆實心出力朕深為
嘉慰惟是現攻之科布曲索隆古兩處山梁即能尅
期得手尚隔舍齊喇嘛寺一隘方能直搗噶拉依或
官兵乘勝果入賊衆難以復支掃穴之功易如破竹

自屬最善阿桂等務當仰體朕意努力速為之

甲子明亮舒常奏言查達撒谷為乃當甲雅緊要
屏蔽賊人于沿山上下礮卡木城重重堵禦極見
嚴密惟向西一帶俱係陡壁懸崖其上雖有堅礮
林立諒賊人以我兵必不能自此而上如出其不
意攀躋而登衆賊必皆慌亂无措官兵即可分路
直上因挑選索倫吉林及綠營官兵內奮勇出衆
者二百四十人帶同屯練土兵分為四隊以投番

阿布僧格太霍爾甲等為引導于初八日寅刻先
令向西攀越一面派令和隆武奎林德赫布等由
達撒谷正路分攻迎面碉卡木城其攻取東向斜
坡上木城二座派令都爾嘉噶塔布等分隊設伏
俟西面兵丁上山得手即同時努力並進又派興
兆烏爾圖納遜于噶爾角帶兵以防巴布里溝內
來援之賊于初九日未及黎明俱令潛密起行四
路官兵奮勇齊進互相接引而上賊雖各處放鎗

拒敵而我兵上下夾攻銳氣愈加各攀開木柵用
土袋填溝越過砍進碉門殲斃賊人甚多其時奎
林等即由達撒谷而西搶取木城石卡五處乘勢
直上將峙甲木一帶碉寨攻獲和隆武即由達撒谷
而東搶取正中黃草坪一帶碉卡德赫布都爾嘉
噶塔布等即由達撒谷而東搶取斜坡上木城碉寨
數處各酌留兵佔據隨即合兵將格爾則沿河所
有寨落盡行奪取

臣

等查達撒谷以前尚有四道

山腿皆從日蓋古落分支其第二道山腿地名擦爾覺其上即為斯密第三道山腿地名赤爾登布里其上即為巴角當噶皆有碉寨聯絡若能并克此兩道山腿則其前之格木呢布一道山腿及向東旁拖小山腿一條皆無足慮因乘賊衆膽落之餘復派和隆武及各領隊等分作數路前進兩山腿亦俱攻克計此次得有大寨落五十餘處木城碉卡三十餘座搶獲鐵礮一位殺死賊番一百餘

名生擒賊番二名

臣

等日內將各山梁留防兵丁

應撤應添之處略為部署即統衆直取格木呢布
一道山腿其日蓋古洛及巴里賊人守此無益
皆可不攻自潰而乃當所有寨落破之易如反掌
其前為甲雜官寨亦無難乘勝掃除奏入

上諭內閣曰明亮等奏由達撒谷進兵連克三道險要
山梁已將沿河格爾則寨落一并攻取官兵等鼓勇
直前攻堅殺賊甚為奮勉亦由明亮舒常等調度有

方故能所向克捷痛加勦洗均屬可嘉其副將軍叅贊統俟大功告成特加茂賞所有帶兵之領隊將弁等著明亮等查明咨部議叙其越險攻碉之索倫吉林及綠營官兵二百四十名及隨同分隊出力之屯練土兵並著查明賞給一月錢糧以示鼓勵

乙丑富德奏言

臣

屢次用礮轟擊賊碉賊勢甚屬

窘迫總緣地當緊要是以抵死拒守元懈可乘查去年奪據穆當噶爾以後其庚額特山梁碉卡年

餘未曾攻打賊人恃險守據日久不元稍懈如能
奪取此道山梁乘勢下攻馬爾邦更為得力隨派舒
亮斐慎巴克坦布開太伊扎布舒津太段學南等分為七
路每路兵百餘名並約防守穆谷之副都統扎爾桑等
同時攻擊以分賊勢臣帶兵百名為各路接應
于初八日丑刻潛至唐額特山脚逼近碉卡賊衆
知覺放鎗抵禦官兵拋擲火彈鎗箭齊施直至卯時
賊始敗入碉內我兵攻得大碉三座卡子八座因

地勢險仄兼無水道必須芟木柵二十餘座以接
河沿始可據守臣等酌將所獲碉卡盡行燒燬帶
出退兵現在大功將成籌辦尤須妥善惟有欽遵
聖訓慎之又慎以期相機進取奏入

上諭軍機大臣曰富德奏派兵攻取唐額特碉卡情形
據稱惟有慎之又慎以期進取等語所辦未免小心
太過用兵之道隨步換影阿桂明亮兩軍深入現又
連次克捷不日即可抵噶拉依賊巢賊情窘迫日甚

一日方護巢救死之不暇又何能軼出他顧富德此時豈仍宜僅以固守後路為事耶二年以來富德毫無寸進此次攻得碉卡又不設法據守雖云業經焚燬然不數日賊人又復造成其與不得何異富德惟當遵照前旨抽撥後路兵丁竭力前進如能三路會合則賊力更不能支而大功告成自當愈速

丙寅阿桂豐昇額海蘭察額森特奏言查

臣

海蘭

察一路官兵前此所掣木柵已距科布曲正梁不

遠若即突然分路上攻搶得迎面各碉卡則一氣直上正梁得手自較為迅速當于初六日晚間分撥官兵

臣

海蘭察帶同伊蘭保官達色等攻搶中

間碉卡木城又派福康安烏什哈達等從左進攻賊人放礮之石卡又派普爾普等從右攻殺濠溝內所藏賊衆而派藍翎侍衛遜集鼐等潛繞賊人碉卡之上向下攻壓

臣

額森特由勒隈勒木通山梁大路直取格隆古先是

臣

等察看情形格隆古之

上科布曲之下其中有小口一處地名兜窩賊人
于中間設立堅碕聯絡據守若從雅瑪朋寨落穿
越林箐而上可以繞至兜窩此一路崖礮陡削攀
越固為費力而轉因地險箐深黑夜由此上攻賊
必無從知覺搶得兜窩從中截斷可破其聯絡之
勢因復派海祿等帶領土兵潛密繞登俟兩處官
兵得手後直前搶佔初七日寅刻臣海蘭察等之
兵奮迅由中路直進于鎗石中間分隊鼓勇上登

殺賊甚衆且遯集衆等之兵又已繞出其上賊不能走紛紛逃遁而福康安普爾普亦同時並上合力奮攻將各碉卡均經克獲賊衆被殲甚多官兵遂直上科布曲山梁之頂隨派各領隊等帶兵下壓科布曲正寨各官兵戰勝之後勇氣倍增奮力攻打當將科布曲寨落又全攻克維時臣額森特督同領隊鎮將等將格隆古以前三碉業已分頭攻克隨即進圍格隆古大戰碉賊見官兵齊上山

梁拚死突圍而出俱被官兵截殺得脫者甚少而
海祿所帶土兵先已潛至兜窩了口隨即攻佔

臣

海蘭察額森特等及海祿各兵會合將科布曲附
近寨落十餘處分派官兵逐一攻克而海祿所帶
之兵并將莎羅奔甲爾瓦沃雜爾向日所居之拉
布咱占一寨分頭奪取至索隆古一處山勢更高
最為緊要其碉卡木城在山岡之上潰敗賊人復
退聚于此即令索倫兵及土兵由林箐中從右繞

進抄出其後而

臣

海蘭察額森特之兵從正路上

攻賊人棄碉奔遁官兵合勢趕殺遂將索隆古拏
柵佔據是夜并乘勢將木巴爾們都斯等碉寨一
併攻獲其安布魯木一帶令總兵成德即于初八
日分隊攻搶又將此一帶石碉木柵概行克獲此
次各處打仗所克大碉木柵石卡寨落一百餘處
殺賊二三百名拏獲活口二名查自克爾古什拉
斯以至科布曲一道山梁賊人恃為屏蔽死守不

遺餘力今仰賴

皇上天威已盡克科布曲各碉寨並將最險最高之索
隆古業經佔據雖投番等稱賊人又欲于鄂衣楂
爾丹布哈爾斯拉瓦等處修築碉卡尚圖抗拒但
進取之路徑較多官兵若從鄂衣楂爾丹布哈爾前
進固可越過斯拉瓦之上而若由斯拉瓦繞進則
鄂衣楂爾丹布哈爾拒守亦歸無用奏入

上諭內閣曰阿桂等奏官兵攻克格隆古科布曲索隆

古們都斯得木巴爾一帶山梁碉卡寨落並乘勝擒
佔安布魯木山峰碉卡官兵等越險直進鼓勇摧堅
所殲醜類甚多且扼賊人要隘皆由將軍等調度合
宜恭贊及諸將領等董率銳進官兵並能奮勉出力
均極可嘉而所得勞績亦較前數次更大阿桂豐昇
額海蘭察額森特及在事之將領員弁等俱著交部
從優議叙以示獎勵仍俟大功告成另沛酬庸渥典
上諭軍機大臣曰阿桂現據之索隆古山梁距噶拉依

賊巢不遠今阿桂乘勝深入勢如席捲雖據投番等
供賊又欲于鄂衣楂爾丹布哈爾斯拉瓦等處修築
碉卡抗拒現在官兵進攻迅速賊衆自皆措手不及
即或舍齊喇嘛寺尚思聚彼力守然距賊巢愈近賊
計愈窮而賊膽亦愈落以我勝兵臨之不啻摧枯拉
朽由彼直搗噶拉依自可尅期掃蕩看來此事搗穴
已有把握而擒渠則宜加意妥籌今索諾木及老土
婦阿倉阿青等于噶拉依甲雜兩處往來無定而莎

羅奔甲爾瓦沃雜爾則逃于庫爾納其守科布曲之
大頭目布籠普阿納木當噶拉阿納木及丹巴沃雜
爾並逃回賊巢其餘莎羅奔二人亦在噶拉依久住
此等必須擒解京師明正典刑此次征勦金川原因
索諾木等之負恩反噬必將逆黨被獲獻俘方為全
美阿桂明亮等至時當多方搜捕務獲勿使一人得
脫誅磔又據投番供出山搭爾薩木坦現在來達木
帶兵其人亦係小金川助惡大頭人必應擒獻者且

來達木為進攻甲雜之路所必經山塔爾薩木坦向
來頗能帶兵打仗明亮等進剿時尤宜加倍留神設
法攻克並將山塔爾薩木坦擒獲解京勿使免脫

臣等謹案大兵攻克科布曲索隆古一帶已距
賊巢甚邇仰賴

天威乘勝下壓自可迎刃節解而犂庭掃穴尤必擒獲
渠酋以彰天討我

皇上諄切

訓示以莎羅奔兄弟及助惡各頭目務須全數獻俘方足快人心而申

國憲厥後逆酋惡黨或搜獲林箐或面縛軍輅無一人倖稽誅磔蓋負

恩反噬覆載不容可彰戒于萬世云

己巳明亮舒常奏言查乃當在格木泥布之前周圍四十餘里中間連接數條山腿內惟近北之布吉魯達那兩處最為扼要若能克取則統兵南向

所過山腿之上半是平坡即甲襟官寨亦在乃當
界內攻之俱非難事其格木泥布沿山寨落高下
布列若官兵逐處攻奪未免費手惟從格木泥布
上至山頂為獨古木思得左側少下為獨古木思
滿各有碉寨十餘處賊人據守其中如能搶佔自
上下壓則格木泥布所有寨落皆可不攻自潰隨
于十四日派令奎林阿爾薩朗都爾甲等攻取獨
古木思得另派興兆噶塔布佔據山頂堵禦和隆武

德赫布阿蘭保等攻取獨古木思滿于將近黎明
臣等督同前往奎林一路官兵爭先競進直砍碉
門痛加殲戮掃蕩一空而和隆武一路官兵纔見
合圍賊即潰竄維時格木呢布各寨內賊人俱棄
而不守其布吉魯及達那兩道山梁雖為乃當險
要乘其驚惶無措之時不難一鼓而下復派德赫
布和隆武等進攻各官兵銳氣倍加賊衆望風披
靡間有捨死抵距者皆被殲戮方當官兵疾馳之

際突有騎馬賊目三人帶同番賊百餘人從旁邀截官兵內僅有四五人挺身上前放鎗射箭賊不待接仗先已四散其賊目在後用刀驅之使戰亦不復相顧而此布吉魯達那兩道山梁山上山下寨落八十餘處官兵隨到隨克立行燒燬計此次殺賊一百餘名搶獲鐵砲一位現在乃當地方已克大半再前更無險阻可虞尤易得手即申雜官寨建于臨河另起石包之上攻之亦為省力但能

一過獨松隘口掃蕩河西賊境自可成于指顧奏

入

上諭內閣曰明亮等攻克獨古木斯得上下寨落乘勢
搶佔乃當之布吉魯達那兩道山梁將領俱屬奮勉
而奎林和隆武尤鼓勇先登懋著勞績各官兵亦皆
踴躍思効銳氣倍加皆由將軍叅贊調度有方用能
所向克捷甚屬可嘉明亮舒常及在事奮勇出力之
將領員弁等俱著交部從優議叙仍俟大功告成另

沛渥恩以酬勲績

上諭軍機大臣曰明亮等奏官兵攻打布吉魯達那時賊皆望風披靡各思潰竄其頭人在後用刀驅之亦不復相顧是番衆之心已散未必復能如前此之併力死守故投出之人日多一日昨因阿桂等奏于投番內挑選精壯者留營打仗恐此等番衆窮蹙投降其心未必可信不宜留于肘腋之間令解往成都監禁今看番衆來降情景自屬無他著傳諭阿桂等查

前次留營各番如有誠心出力者仍留營聽用不必解送成都設或其中有心懷叵測形迹可疑者不妨即于軍前正法其尋常投出番衆止須善為撫輯勿使驚疑但現在營中兵數頗多無復藉資番人之力嗣後續有來投番衆祇須照前安插勿多選留營尤為穩當將軍等均當斟酌妥辦以期全美

庚午阿桂豐昇額海蘭察額森特奏言查賊人于科布曲要隘既失之後雖勢窮力竭尚思以布哈

爾則朗噶克為危巢屏蔽必當分路力取臣額森
特帶領隊章京鎮將等從山梁正面攻打布哈爾
碩卡賊已箇禦嚴密難以一舉必得因察看形勢
其山梁迤西雖亦峰巒陡峻林木叢深而山坳尚
有一綫歌仄之徑可以繞出朗阿古之後蓋以朗
阿古迎面山勢更為險削必須攻克斯拉瓦克爾
切木兩處前至甲木爾始能回攻朗阿古既得朗
阿古然後可以抄截布哈爾之後壓取則朗噶克

使賊失其所恃

臣

海蘭察即帶領各領隊侍衛鎮

將等從此進攻均于十三日丑刻進發詎賊于索

隆古至布哈爾中間均挈有礮卡木城並又于此

處礮卡之上布哈爾之下將樹木砍倒層層堆積

尚欲逞其暫時拒守之計是時

臣

額森特率同烏

爾納那木扎彰霽等督兵前進將礮卡木城均行

克取及至倒木堆積處所賊已潛伏樹木叢密之

中儘力放鎗迎拒官兵正在覓路前進而

臣

海蘭

察之兵已從山坳繞過將近斯拉瓦克爾切木遂
令普爾普額爾特居右烏什哈達官達色居左而
臣海蘭察福康安及瑚尼爾圖伊蘭保等居中並
進立即奮勇攻開一面留兵佔據一面帶兵越過
旁崧山腿三道直抵甲木爾又將碉寨克獲隨即
回攻朗阿古而達爾卓克頭人色木里雍中已預
先送信歸誠從中接應遂將朗阿古佔據當將衝
上山梁將得拉古碉卡攻克截斷則朗噶克了口

之後殲賊甚多維時布哈爾賊人見官兵已出其

後驚惶无措

臣

額森特即督官兵砍開樹木前進

遂將布哈爾碉卡攻克而書麟海祿特成額預備接

應之兵并即攻至則朗噶克山梁之上將了口各

碉均行奪據是日

臣

海蘭察同普爾普瑚尼爾圖

等由巴薩沙進攻奇什磯官寨俱行奪獲海祿之

兵并即由則朗噶克了口下至溝底將噶爾噶木

勒烏果木德克聶烏各寨落悉行焚燒十四日

臣

海蘭察一路又派官兵將庫爾納額木里多各寨
及巴斯科官寨逐一剿洗下至瀕河并將得里角
寨奪獲十五日又派官兵攻佔噶占官寨十六日
官兵循噶占山腿而上拏住山梁其瑪爾角各寨
落亦皆克取連日打仗共得官寨三處碉寨四五
百處獲九節鉄砲一尊鳥鎗刀矛等物甚多拏獲
活口五名現在官兵已據噶占山梁之上距瑪爾
古當噶甚近且賊已披靡不堪而投出者又復千

百成羣臣等惟有乘此銳氣即于一兩日內分路進取一佔瑪爾古當噶則順梁下壓舍齊喇嘛寺噶拉依諒必勢如破竹

同日阿桂豐昇額又奏言本月初十日有達爾卓克寨頭人色布里雍中遣人稟請投降并稱附近碉卡多係伊所管之人如准投降俟官兵打仗之日即為內應臣伏思金川滅亡在即色布里雍中欲乘此時自救其死固為情事所有且我整兵而往

即有詭計亦无所施因即准其所請于十三日進
兵時果即出卡跪迎即日隨軍打仗殺賊凡賊中
虛實無不一一直告是晚又稟稱大頭人布籠普
阿納木與伊素常相好求遣人前往招降臣等以
布籠普阿納木久拒顏行其罪本無可追但此助
惡頭人均當設法生致方能明正刑章况布籠普
阿納木原係土舍先行投出賊人震動更必盡成
瓦解而其餘大頭人等見布籠普阿納木投出得

保首領必皆萌倖生免死之心更可以多得數人
當即聽其遣人招致去後茲布籠普阿納木帶領
丹扎布六寨男婦老幼共一千餘人並與迷輸喇
嘛一同投出均奏入

上諭內閣曰阿桂等由索隆古進攻所向克捷現據噶
占山梁整兵直搗噶拉依且逆酋平日所恃之大頭
人亦率屬出降可見賊中勢已瓦解指日可期掃穴
擒渠皆由將軍叅贊等調度有方故能動合機宜屢戰

克捷而海蘭察尤勇畧超羣諸將領並皆奮勉出力
實屬可嘉著將阿桂豐昇額海蘭察額森特及領隊
大臣並將領員弁等俱交部從優議叙以示獎勵仍
俟大功告成再沛酬庸茂典

上諭軍機大臣曰前因阿桂等攻克科布曲索隆古山
梁即可乘勝下壓已成破竹之勢今官兵果能越過
旁岔山腿摧開險要殲賊奪碉甚多並掃除一切附近要
隘寨落現駐噶占山梁之上距噶拉依甚近賊勢已

極披靡從此直搗賊巢自同摧枯拉朽至達爾卓克
頭人色木里雍中願為官兵內應望塵跪迎並招降
大頭布籠普阿納木伊等即率所屬千餘人並與迷
輸喇嘛一同投出布籠普阿納木係助惡大頭人向
為逆酋所倚仗且近從科布曲逃回若非實見賊衆
滅亡在即亦斷不肯輕率出降其色木里雍中甫經
投出即隨軍打仗殺賊自當分別加恩使蟻衆聞風
心動更必勢成瓦解其餘黨逆頭人或有不義而思效

者并可期罪人皆得亦是用兵權宜之法布籠普阿
納木本係其大頭人著賞孔雀翎給以四品頂帶其
色木里雍中著賞戴藍翎給以六品頂帶此內色木
里雍中尤屬誠心如再有出力自効之處并不妨量
為錄用其布籠普阿納木雖膺章服之勞仍當不動
聲色留心密防方為妥善

壬申明亮舒常奏言查乃當地方廣濶沿山碉寨
稠密而甲雜官寨四圍賊卡重重必須多分數路

上下抄截方成席捲之勢隨派奎林和隆武德赫
布珠爾格德都爾嘉等分隊攻打臣等督同興兆
舒景安在後策應隨于十五日未刻各官兵同時
並進所有乃當一帶悉行佔據惟甲雜官寨原係
索諾木居住之地牆垣高厚賊人尚猶據守臣等
因其地已在我掌握之中不值與之相搏飭令圍
其三面惟臨河乃係陡砌即欲脫逃所全無幾至
亥刻果見賊人紛紛棄去我兵即時追殺鎗箭所

斃之外大半落水隨即乘勝直抵獨松

臣等查日

蓋古洛已在大兵之後相拒前敵甚速即使賊人負隅自固本可置之不理惟以此峰為衆山之頂得此以下通正地勢若建瓴又于十七日派令馬彪教成帶兵前往賊人四散奔逃而溝內之中巴布里下巴布里以及對山之瑪雅崗角木各寨賊人不待官兵來剿先自棄去現在後路將及百里全行肅清此時河西賊境惟獨松正地未下

臣等

現在抽齊兵力差探地勢不拘何路可以制勝即擬進剿

同日明亮舒常又奏言查乃當大頭人達固拉得爾瓦即係本年六月間丹東盤獲解京達固拉僧格之弟十四日遣人來營請降_臣等于十五日派兵前往剿殺而達固拉得爾瓦即領番衆五百餘人自內衝出與官兵會合將土舍庸中旺嘉勒用鎗擊仆擒縛以獻十六日官兵攻克甲雜復生擒

邁布星根他如沙爾尼阿爾古巴布里等處頭人
番衆適至獨松之下喀拉地方隨有頭人思達爾
結等即領番衆六百餘人赴營納降計先後投出
頭人及各寨散番共一千一百餘名庸中旺嘉勒
邁布星根均係助逆重犯自應一併解京獻俘
臣
已派撥官兵解赴成都訖均奏入

上諭內閣曰明亮等奏官兵攻得甲雜官寨并後路巴
布里日蓋古落一帶全行剿洗乘勝進抵獨松隘口

將軍叅贊調度有方諸將領官兵亦各奮勇出力用能屢戰克捷實屬可嘉著將明亮舒常及領隊大臣將佐負升等俱交部從優議叙以示獎勵

上諭軍機大臣曰明亮等將河西一帶全行肅清惟餘獨松正地未得看來賊番如此窘迫亦不能復行抗拒明亮等一得獨松即當統兵渡河攻打雍中喇嘛寺與阿桂成犄角之勢夾擊賊巢自更易于掃蕩又據奏大頭人達固拉得爾瓦率乃當衆番五百餘人

投降並為官兵內應擒獲土舍雍中旺嘉勒來獻頗
屬誠心又噶拉頭人思達爾結亦率屬六百餘人來
降並當予以獎賞達固拉得爾瓦著賞戴孔雀翎給
以四品頂帶其所獲之土舍庸中旺嘉勒乃草布什咱
一案罪魁即邁布星根亦助惡要犯均當一併解京
今明亮等已將二犯解赴成都著文綬即嚴行監禁
每日給以口食其庸中旺嘉勒現受鎗傷並為調治
痊愈俟拿獲索諾木及緊要逆犯一併檻解京師獻

俘並諭令文綬知之

卷一百三十

平定兩金川方畧卷一百三十

欽定四庫全書

平定兩金川方畧

人名

地名

格卜爾章

獨松

阿衫斯達拉木

衫改

善

卡拉爾

甲爾勒歪斯

歪改

外

舍斯滿

囊策克納木

噶拉依

當噶拉阿納木

甲爾木

蒙古固阿甲

馬爾邦

布籠普阿納木

太約

達什阿庫魯

噶咱普得爾窩

索諾木

斯第博堵

莎羅奔

庚額特

丹巴沃咱爾

克舟九寨

阿木魯綽斯甲

絨布寨

沙巴租普

瑪爾古當噶

達固拉得爾瓦

喇烏喇

阿卜策妄

木果木

丹甲巴

綽爾丹格薩木

阿倉

則朗噶克

堪布喇嘛

噶占

阿青

得爾龍

得什爾章

雍中喇嘛寺

得什安人楚

格爾巴夾木巴雪寨

噶布則

克角干登

甲木泰

拉古爾

甲噶朋勒爾悟太

莫克巴札木克什

策楞多布丹

喀爾巴

囊結

甲爾雜爾

山塌爾薩木坦

伽難咱爾

綽爾甲木燦

巴布朗谷

溫布

底角

布拉克底

阿爾古

噶咱爾谷喇嘛寺

僧達

捫達

角木喀爾角

普爾普

俄勺角

前改

鄂碩覺

功噶爾拉喀爾薩爾

昔嶺

斯尼岡

達扎克角

索隆古

格爾格普

熱水塘

雍中

欽定四庫全書

平定兩金川方畧卷一百三十一

四十一年正月癸酉明亮舒常奏言查獨松一道
山梁橫揲河流三面俱係陡壁僅有一線上通之
路賊礮憑高阻拒自獨松以前為卡拉爾亦屬險
峻再前為舍斯滿距獨松三十餘里臣等隨於十
九日派令奎林和隆武興兆德赫布珠爾格德等
率同侍衛章京分作數隊彼此互為策應於本日

辰刻搶上獨松碉內賊人始猶放鎗滾石將及碉前賊人倉皇四遁復聚集於卡拉爾山梁臣等竊念噶拉依破在旦夕恐逆酋等先行逃竄則正地一帶極為緊要自應迅速平定以絕其去路隨一面發兵疾趨正地該處各寨番衆均已伏地乞降當即准其所請而卡拉爾舍斯滿兩處番衆亦即相繼投出內有大頭人格卜爾章阿善斯達拉木甲爾勒外斯囊策克納木四名臣等目下統兵已

過卡拉爾舍斯滿以南尚有甲爾木及馬爾邦等處自宜乘勝掃除接通富德一路官兵倘或噶拉依尚需添兵密布已札詢阿桂俟其札覆亦即可帶兵渡河而東以壯聲勢

同日富德奏言

臣

于十二月十九日令舒亮副將

舒金泰副護軍叅領阿蘭泰傳森布等帶兵一千餘名分為數隊由太約進攻壓至河沿

臣

與總兵

斐慎巴克坦布等帶兵六百餘名攻打噶咱普得

爾窩於二十日丑刻奮勇齊進賊衆施放鎗礮我
兵即望賊人火光衝入槍至溝邊拋擲火藥一時
火燄飛騰刀鎗並舉賊衆勢不能支各棄碣逃竄
臣等乘勢追殺至馬爾邦賊衆乞命投誠因將馬
爾邦官寨及週迴寨落盡行看守而舒亮等從大
約等處分路進勦賊衆始猶抵拒旋即敗竄官兵
追至斯第博堵直抵馬爾邦兩路會合所得地方
週迴百里有餘碣寨木城卡子共百餘座拏獲番

人及投誠男婦甚多其庚額特克舟九寨即可相
繼攻取至現在新得地方派兵看守不敷即飛檄
李世傑哈青阿撥兵前來李世傑等即照檄發兵
七百名後路分守亦可無虞均奏入

上諭軍機大臣曰明亮等奏攻克獨松及卡拉爾舍斯
滿一帶地方覽奏欣悅並據富德奏已攻得馬爾邦
斯第博堵富德自至絨布寨以來惟此次最為奮勉
已交部將富德及將領員弁交部從優議敘明亮等

統俟大功告成再加渥賞

甲戌阿桂豐昇額海蘭察額森特奏言查瑪爾古當噶為進取舍齊喇嘛寺噶拉依要路了口既設有堅碉而喇烏喇左通木果木右據瑪爾古當噶之上賊人早已設碉聯絡且深挖溝濠布置更為嚴密若止從瑪爾古當噶進攻恐賊得以併力拒守必須首尾並擊隨公同籌議臣額森特從則朗噶克了口上搶喇烏喇山梁各碉臣海蘭察由瑪

爾古當噶以南綽爾丹格薩木山梁進攻十六日
夜臣額森特先帶兵由則朗噶克一面拏柵上逼
一面分撥官兵從箐林叢深之中潛密攀越而上
至相近大碉處所暗為埋伏賊見我兵豎柵進逼
果於十七日寅刻從高而下突然衝擊臣額森特
即督率埋伏之兵從箐林中間直攻各碉卡將守
卡賊衆全行殲戮其侵擾拏碉之賊望見我兵已
據梁上碉卡驚慌潰散官兵奮力追殺除滾落崖

礮之外殲戮甚多遂乘勝循梁攻壓將瑪爾古當
噶礮卡佔據並克獲山梁迤東一帶寨落臣海蘭
察之兵派令福康安普爾普瑚尼爾圖等於十七
日寅刻分隊由噶占前進將山梁左右寨落礮卡
一併克獲又從山坳前進攻佔得爾隴山坡至是
日夜我兵齊抵舍齊喇嘛寺四面奮攻撲入寺內
將抗拒賊人併力勦殺得脫者甚少其寺旁礮寨
亦俱乘勢搶佔並殲其頭人當噶拉阿納木蒙固

阿申十八日復進攻雍中喇嘛寺其時各處潰散
賊人盡已歸入寺內捨死抵拒隨派普爾普官達
色額爾特從右進攻福康安瑚尼爾圖泰斐英阿
從左進攻而臣海蘭察率同伊蘭保格勒爾德從
中衝壓至戌刻官兵四面圍定鎗箭如雨賊不能
支當有喇嘛六十餘名出寺投降餘賊驚慌奔潰
我兵追殺甚多即將雍中喇嘛寺封鎖派兵嚴加
看守臣額森特即於十八日帶兵從瑪爾古當噶

順東山腿攻打將格爾巴夾木巴雪寨下至克角
干登亦經搶佔此連日打仗攻克碉卡寨落五百
餘處殺賊不計其數查噶拉依碉寨高堅鞏固較
勒烏圍局面更大詢之投出大頭人布籠普阿納
木達什阿庫魯供稱索諾木及莎羅奔等兄弟五
人以及丹巴沃咱爾阿木魯綽窩斯甲等均在其
內率衆拒守現在福康安普爾普等帶兵從拉古
爾向河挈卡以圍賊人之右臣海蘭察即從莫克

巴扎木克什官寨下至河邊圍賊人之左臣額森
特從克角干登下至喀爾巴河沿仍各接拏木柵
兩三日內諒可合圍則水陸俱斷賊酋等萬無逃
竄之路至金川大頭人達什阿庫魯沙巴租普俱
已投出沙巴租普因帶伊家口尚未到營先將達
什阿庫魯供詞錄呈

御覽至本日晚間有投番來稱索諾木之母姑姊妹俱
已投順現於河西之甲納雜爾渡河前來統俟到

時另行訊供奏

聞外於誘擒索諾木兄弟之事亦甚有裨益奏入

上諭內閣曰連日兩路將軍馳報得勝捷音賊勢已萬難支禦今阿桂又將附近賊巢之碉卡寨落五百餘處全行掃蕩已將噶拉依四面圍攻水陸俱斷指日即可擒渠掃穴迅集洪勲實由將軍阿桂等調度精詳機宜悉中用能所向克捷甚屬可嘉所有將軍叅贊及領隊大臣各將弁等均著交部從優議敘俟紅

旗奏捷再沛渥恩

上諭軍機大臣曰阿桂等現已統兵直抵賊巢四面攻圍并知索諾木莎羅奔兄弟及助惡之丹巴沃咱爾等俱在圍內自更無從奔竄但須設法生擒勿令窘急自斃方為萬安聞索諾木之母姑姊妹俱有投出之信果爾則逆酋等或亦可招致阿桂自有權衡至現在投降之達什阿庫魯其罪惡尤重非布籠普阿納木達固拉得爾瓦可比將來尚須一同獻俘者但

此時不妨經權叅用姑賞以翎頂或彼果能招誘逆酋等來投原可假此為餌統於功成獻俘時分別伊等罪狀再行定奪

丁丑明亮舒常奏言舍斯滿以前為舍斯得再前為甲爾木其下臨河為伽難咱爾官寨而相連之巴布朗谷山勢險峻均於二十日奎林和隆武等帶兵盡行佔據與馬爾邦止隔底角一山大兵所到各番衆伏地請降隨統兵將近馬爾邦旋據布

拉克底番人告稱馬爾邦頭人百姓已在富德一路就近納款是河西賊境已無不在蕩平之內惟噶拉依官寨雖經阿桂派兵三面圍攻沿山布置而臨河一面即與巴布朗谷相對恐逆酋兄弟渡河逃竄因即於是晚先派土兵趕至河沿挈卡滿漢官兵亦即於次早一律到齊重重密布查自阿爾古以至底角河沿行走約有一百四五十里而奎林等帶兵前往必須自上壓下方為得勢繞越

山頂而行幾及三百里其間數百餘處寨落內男婦大小各番均就撫定尚有大頭人阿卜策妄以及丹甲巴僧格亦已投出並委員嚴加管束臣等即于二十二日移營已布朗谷駐扎

同日富德奏言竊臣現駐兵馬爾邦復佔據噶咱爾谷喇嘛寺等寨落五六十處其舒亮所帶官兵由僧達一路前進各寨番衆俱望風來降將捫達角木喀爾角普爾普等處寨落盡行佔據現已與

西北兩路大兵會合攻圍噶拉依賊巢均奏入

上諭軍機大臣曰明亮等奏河西賊境全已蕩平現於噶拉依對河之巴布朗谷密布營卡會擒逆酋富德亦奏佔據噶咱爾谷等寨落現與西北兩路官兵會合覽奏均為欣慰至各路番人紛紛投出其中大小頭人俱復不少此等番衆從前抗拒官兵捨死固守情罪均屬可惡直至兵臨巢穴計窮力竭始行投降非若大兵尚未深入以前陸續來投者可比但衆番

皆係曾與官兵打仗之人此時難以分其所犯輕重
且抵拒官兵固屬可恨而原其所以捨死堅守尚知
各為其主亦復可矜況為數過多又係投降乞命若
盡予駢誅實覺心有不忍惟其中大小頭人及其眷
屬自不便留本處應照前此平定準部時所有台吉
宰桑德木齊等槩行移徙之例妥為辦理至各處降
番若移于他處編管未免人多費事伊等俱係嫻于
耕作之人兩金川又有可耕之地現在凱旋後兩金

川地方立汎安營添設提督總兵等官足資彈壓其
應辦善後事宜內原有隨處耕屯之議莫若即用此
等降番就所在墾耕安業盡力農功各有將弁管束
久之亦可消其桀驁不順之氣而令其交糧亦省川
省運餉之勞惟是編立營屯必須安設頭目當于隨
營攻勦之他處土兵內擇其出力者充當既足以示
獎勵又令他處之人管理更不慮其故智復萌至此
等降番餓乏已久既欲令其耕種自難以枵腹從事

著將軍等量為賞給籽種口糧俾口食有資自更安心盡力將軍等宜及此時早為籌辦將此令諭知之
己卯阿桂豐昇額明亮海蘭察額森特奏言查賊酋索諾木弟兄及作惡頭人均在噶拉依官寨自必嚴密圍困使其萬難軼出始可設法俘擒臣海蘭察同福康安普爾普額爾特等帶兵拏卡直至河沿以截噶拉依之右派烏什哈達由噶拉依官寨正山腿拏卡下逼近據噶拉依之上臣額森特

等帶兵攻克喀爾巴寨後又將附近寨落九處攻克焚燒直至河沿以截噶拉依之左兩翼卡棚之外復接挈營卡以為兩層堵截其鄂碩覺十寨以南山梁前派侍衛訥松額等帶兵駐守今於二十二日晚富德處遣舒亮帶領漢土官兵數百名前來即令於訥松額等所駐之地駐扎至臣明亮西岸沿河一帶業已聯絡營盤卡座嚴密防堵臣阿桂豐昇額復派兵從右手過河於拉古爾對面山

腿多挈卡座以為聯絡而左手一面西北兩路官兵亦俱合圍如此層層圍定賊人斷無從偷越第恐賊人或從水路順流逃竄臣等又於噶拉依官寨上游下游飭令將領等緊貼水面以竹索藤繩合力趕造浮橋橋兩邊各築卡座派令勇幹官兵日夜巡查防守賊人非但不能乘坐皮船而逸即欲赴水自盡而順流至此亦可攔住是水陸俱斷布置已極嚴密再臣阿桂等先經分派官兵將木

果木昔嶺斯尼固達扎克角功噶爾拉喀爾薩爾
以及鄂碩覺十寨一律掃除各寨番人早已望風
投順而臣明亮河西一路及富德一路各番衆亦
俱歸誠恐後現在金川全境業已底定惟餘噶拉
依巢穴自歸掌握至河西一帶臣明亮現今舒常
同奎林和隆武於喀爾巴對面山上山下分駐官
兵嚴加防範外即於二十四日來赴西路合力圍
攻並與臣阿桂豐昇額等商辦一切惟查噶拉依

碉寨高堅其旁寨落尚多賊酋率其同惡於此死
守稍俟用礮轟摧自不難於掃蕩但從索隆古而
至噶拉依計程幾及百里山路崎嶇險仄且積雪
凍凝舊有大礮難以拉運現在趕運礮料上緊鑄
造此兩三日造礮之隙令逆酋之母阿倉及堪布
喇嘛等招令賊酋兄弟來投如其果能生致俘擒
檻送以戴大功更為妥善否則俟大礮造成兩三
位即竭力轟摧亦可計日克取奏入

上諭內閣曰阿桂等奏官兵已將金川全境掃平現在
四面攻圍噶拉依巢穴覽奏深為欣慰并閱進到地
圖賊境碉卡寨落均經大兵勦洗所餘惟噶拉依叢
爾彈丸不及已得地百分之一自可即日掃蕩是征
勦金川之役已屬歲功又據稱賊酋索諾木弟兄及
作惡頭人均在噶拉依官寨今經嚴密圍困斷難復
行軼出便可設法俘擒且索諾木之母阿倉姑阿青
及其姊妹均已來營投降更不虞索諾木等尚懷觀

望所有渠兇黨惡自必即行擒縛馳遞紅旂褒績酬
勲宜頒渥典將軍阿桂蓋誠體國不憚艱勞制勝運
籌克成偉績實為此事首功前曾賞戴雙眼孔雀翎
並於攻勒烏圍時賞用紅寶石帽頂茲著加恩封為
頭等誠謀英勇公並賞四團龍補褂金黃帶以昭崇
獎副將軍豐昇額明亮抒誠勵勇協力宣勞亦堪嘉
尚豐昇額本襲公爵復加賞繼勇名號著再賞以一
等子暫令伊弟布延達賴承襲俟豐昇額生子後仍

令其子承襲布延達賴現係藍翎侍衛令既承襲子爵著授為三等侍衛明亮著封一等襄勇伯叅贊大臣海蘭察每遇推堅奪隘無不鼓勇先登實為超眾著加恩封為一等超勇侯以示優異叅贊大臣額森特領隊大臣奎林和隆武福康安普爾普均各奮勇出力茂著勤勞額森特著賞給一等男奎林本係公爵著加賞一等男即令伊子承襲和隆武本係子爵著晉封三等果勇侯福康安著賞給三等男所有伊

原襲伊兄福靈安之雲騎尉著福隆安之次子豐伸
果爾敏承襲普爾普著賞給三等男豐昇額明亮海
蘭察奎林和隆武仍各賞戴雙眼花翎共昭榮獎
大學士子敏中自辦理軍務以來承旨書諭夙夜殫
心且能鉅細無遺較衆尤為勞勩其前此過失尚可
原恕著賞給一等輕車都尉以示格外恩眷所有此
次恩賞世爵世職均著世襲罔替至應予錄敘之將
士並各項應予議敘議賞之官員人等及應行諸典

禮俟紅旗馳遞到日再降諭旨

臣等謹案兩金川之役前後五年軍書旁午

臣阿桂等奉職戎行凡山川險要攻克機宜仰荷
睿籌密運宵旦勤勞無一事不稟承

廟算無一事不炳燭先幾俾諸臣得凜遵

訓旨宣力受成是以

德威所播兵力所加應響迎機往無不利茲以

褒錫酬庸

特頒渥典諸臣拜躬桓之上爵綿帶礪之榮封異數

隆施同膺

懋賞實自古非常之寵遇臣阿桂被

恩最重銜感尤深茲復奉

命與修方畧載頌

綸言光照簡冊愧無以仰報

生成於萬一爾

同日阿桂豐昇額又奏言索諾木之母阿倉姑阿青及僧格桑之妻得什爾章並索諾木之妹得什安木楚四名均至大營據阿倉等供稱索諾木年小因聽信頭人慫恿致干

王法今我等業經投出若差人前往曉諭他們想必出來等語查噶拉依官寨大兵四面圍攻尅期可得但大功告成當以生縛逆酋獻俘

闕下為至要令阿倉等偷生投順倘能因其母以致

其子亦係辦理之一法查跟隨阿倉等出來之喇嘛噶布則向為逆酋弟兄所信現已准阿倉等所請遣伊前往噶拉依諭令出降而危巢破在旦夕賊酋等亦斷不能別施狡獪伎倆

同日阿桂豐昇額明亮又奏言西北兩路大兵自攻進賊巢以來番衆望風投順為數甚多此種助逆番人直至力屈勢窮始行投出嚴辦固無足惜但此時若留在大營俟至軍事全竣請

旨後再為查辦則時日有稽且應多兵防範所有現在
應撤官兵亦不能及早全撤更滋糜費臣等此時
辦理投出番衆其大小頭人等留在大營均有將
備弁兵看守俟事竣分別辦理至番衆內稍有可
疑可惡情節現即隨時正法斷不肯稍存姑息餘
俱分別安插綽斯甲布革布什咱校磨卓克采從
噶克丹壩明正木坪布拉克底巴旺鄂克什瓦寺
十二土司地方其各土司又分安各寨各有頭人

為之管束勢散力孤實可無虞生事且均有冊檔
可稽將來即有另辦之處亦無難查辦均奏入

上諭軍機大臣曰阿桂等奏稱索諾木之母阿倉及其
姑阿青并伊姊妹帶領從人喇嘛等于十二月二十
日到營投降並准阿倉所請差人往諭索諾木出降
因母以招其子實亦誘擒生致之機若逆酋等果皆
投出自更為省力佇盼紅旗旦晚即至又另摺覆奏
籌辦投出大小頭人及番眾一節所見亦是即照阿

桂等所請行至提音到後即應祇謁

兩陵并告功

闕里原擬於謁

陵禮成即行郊勞再舉東巡現已擇于二月初九日起鑾
為時甚近將士凱旋未必能如期遄至且番境初平
其善後事宜應辦者甚多均關緊要亦須阿桂親為
經理方覺妥善今定於謁

陵後即奉

皇太后聖駕巡幸山東計回鑾約在四月十五以前由寶
稼營登陸經南苑新衙門至黃新莊路亦近便阿桂
等于大功告成即將善後事宜妥為料理帶領應行
郊勞之將佐京兵等酌量日期起程于四月十五以
前至黃新莊以備勞還大典實屬兩便將此傳諭知
之

同日桂林奏言本月二十三日據弁兵等解到投
出金川番人甲木叅臣親加查訊據供原係正地

頭人二十八年曾從正地來投革布什咱經該土
司給與田地安置在格爾格普三十六年金川搶
佔革布什咱地方該番復逃歸金川仍令充當正
地頭人今見金川滅亡是以前來投誠等語臣隨
傳令革布什咱頭人甲噶朋勒爾悟太等認質據
稱甲木叅從前來投時土司原給與田地安插後
土司色楞敦多布在熱水塘被金川殺害即係甲
木叅先行動手用刀殺死現有彼時跟隨土司之

囊結目覩可以對質求重重處治為我土司報讐
等語隨傳囊結質証甲木叅俯首無辭臣查甲木
叅首先殺害土司以致釀成大事現在革布什咱
頭人番衆等人人切齒如不明正典刑實無以服
衆番之心且恐助惡凶徒不知畏懼當即傳齊土
舍頭人及番民等將甲木叅正法示衆奏入報

聞

庚辰

上諭軍機大臣曰昨已降旨將軍營領隊大臣歷經打仗克捷出衆超羣者如奎林和隆武福康安普爾普等核其功績各予酬庸渥典至此次平定兩金川攻勦打仗之處甚多其領隊大臣侍衛等或尚有奮勇出力勞績可錄者自當量予加恩若併有實在超軼等倫厥功茂著者更當特加優獎並著阿桂等一體查明奏聞其明亮富德兩路將領並著查明交阿桂再行核實具奏候朕酌量分別施恩以昭公允

癸未阿桂豐昇額明亮海蘭察額森特奏言臣等
先准阿倉阿青等所請遣喇嘛前往噶拉依曉諭
賊酋兄弟等投出茲於二十八日莎羅奔岡達克
來至大營臣等詔以大兵業已如此合圍死亡在
即何以索諾木尚不親詣軍門據莎羅奔供稱昨
日我母親阿倉打發喇嘛進來我兄弟商量因我
居長是以叫出來求將軍大人恩典容我與母親
商量再差人去叫兄弟們出來至向來所作不法

的事俱因我兄弟年幼聽信頭人之言如今悔之
無及等語臣等思此時賊人力竭勢孤斷無所施
其狡獪伎倆現將岡達克等嚴密拘留小心防範
至噶拉依碉寨高堅官兵斷不能硬撲而入以為
手縛逆酋之計現因礮位難於擡運另行鑄造而
自索隆古以至大營山路崎嶇險仄冰雪凝結即
鑄礮料物亦不能迅速運來是以僅成大礮一位
三四日內又可鑄成兩三位如逆酋索諾木等尚

復潛藏死守亦不能久為等待轉使多延殘喘臣
等當督官兵合力轟摧自可立時掃蕩再查山塔
爾薩木坦其妻子先於西路投出臣等查該犯所
居寨落本在阿爾古地方諒必於河西藏匿當即
派令漢土官兵沿山搜捉隨經綽斯甲布土舍綽
爾甲木燦及頭人溫布於二十六日在獨松箐林
內挈獲經舒常解赴河東臣等查山塔爾薩木坦
為金川助惡重犯自應同在獻俘之列現在嚴加

看守侯擒獲索諾木弟兄一併檻送到京

同日阿桂豐昇額明亮又奏言竊大兵四面攻圍
噶拉依業經層層布置所餘兵衆不必存駐以省
糜費臣等公同酌議將西安滿洲兵一千四百餘
名分為三隊令副都統書麟先撤分作三日頭隊
業于十二月二十八日起程荊州滿洲兵一千七
百餘名令公興兆繼撤此二項應撤官兵移咨總
督富勒渾文綬轉交沿途官員照例辦理均奏入

上諭軍機大臣曰阿桂等奏莎羅奔岡達克來至大營
供稱欲見其母再叫人往喚兄弟們出來現將岡達
克等嚴密拘留小心防範等語所辦甚是索諾木勢
已窮蹙經其母差人招諭尚不即時出降僅令其異
母之兄至營探試甚為可惡此必丹巴沃咱爾等狡
謀以噶拉依運貯糧食頗多可供番衆餬口尚思觀望
支吾苟延殘喘且冀抵禦日久使官兵糜耗軍糈或
希將軍等惜費解圍彼得逞其伎倆則令我多費軍

儲亦可稍釋其憤恨看來賊智必不出此兩者因思
阿桂等業將賊巢嚴密圍攻所帶現兵已足數用且
各處後路俱係將軍等一例掃淨即可無煩多兵分
布守卡此時自應量為裁撤茲據阿桂奏已將西安
兵一千四百餘名荊州兵一千七百餘名交書麟興
兆各自分撥帶領先行撤回辦理極為妥協至其餘
各省調到之綠營兵大率守卡者多亦當擇其中不
能攻戰僅堪分守者酌量陸續減出即以所節之糧

供我存兵之用更覺充裕于歲功全局尤為有益阿桂等當即妥酌而行又阿桂奏現在鑄成大礮一位三四日內又可鑄成兩三位自應上緊轟摧使其無堅可恃即或叅用招誘之法亦不宜稍懈攻打庶賊衆驚惶窘迫利害相權或可冀其乞降免死此乃一定之理想阿桂必能見及也至山塔爾薩木坦係助惡要犯必須獻俘誅磔今綽爾甲木燦溫布將伊搜縛甚屬可嘉應即酌加獎賞以示鼓勵至攻得舍齊

雍中兩寺俱有喇嘛投出此等皆曾為逆酋念經之人斷不可仍留該處致番衆等心存希冀潛滋事端況此輩在營非若壯夫之可以出力隨攻又毋庸藉其招致逆犯留之亦屬無益應將所有喇嘛即用檻車拘解送京并派妥員沿途嚴密管押勿稍疎虞

同日鄂寶顏希深奏言將軍明亮等現已進至巴布朗谷山梁去阿爾古舊營三百餘里中間必須添安數站軍糧方可接運臣等一面抽調人夫添

安新站一面親赴各處督催趕運以期迅速集事
但北路軍糧自歸併西路以來所存臺站本屬無
多因督飭各站員各就本地多為招募人夫速行
安設趕運軍儲現在自阿爾古至獨松各站糧石
業已暢行惟獨松至巴布朗谷山險路長必須適
中處安設臺站現於雍中喇嘛寺添安一站以便
接運再查北路軍營已抵巴布朗谷山梁駐劄目
今地勢情形距西路較近而距北較遠現已搭有

浮橋以通兩路若將北路軍糧一并解由西路運
道既歸省便而北路新設臺站亦可量為裁撤臣
等現在公同籌辦奏入報

聞

平定兩金川方畧卷一百三十一

欽定四庫全書

平定兩金川方略卷一百三十二

二月乙酉

上諭軍機大臣曰阿桂自攻圍噶拉依以來賊衆尚敢
護死抗拒實為可恨昨逆酋雖將莎羅奔岡達克遣
其來投尚係異母之兄不甚愛惜是以令其先為嘗
試看來逆酋等之敢於聚衆久拒必因該處早經運
貯糧食藉以支持但思圍中不能不資水日用其向

西臨河一面已經官兵圍截賊衆斷不能復向河邊
運取其圍中即或有井亦未必足敷飲汲自係將大
河之水引以供用因閱阿桂前日進到地圍其大河
之南有支河一道經得什科爾之地賊番自必資藉
此水其水或係大河分流或自夾巴寨流出歸於河
內未能遙揣但河口近接官兵喀爾巴浮橋而自夾
巴寨至莫克巴寨一帶久經攻克安營此兩處皆官
兵力所能及若能設法截住上游使番衆無所供汲勢

必自潰似屬攻圍上策阿桂應即安速酌辦

己丑阿桂豐昇額明亮海蘭察額森特奏言查大
兵四面合圍層層嚴密噶拉依旦夕可破但賊酋
賊目雖已萬無可延必期全獲生致獻俘更為盡
善今岡達克已經俘獲伊復與伊母商量求即差
人前去諭令索諾木等出來當即于初三日用阿
倉阿青岡達克圖記寄信諭索諾木等言汝等不
肯出來不過因無詞免罪若將小金川頭人七圖

甲噶爾思甲布七圖阿甲及張坤忠等擒縛親身
同頭人前來獻出並稟從前抗拒大兵皆係此數
人唆使汝兄弟及頭人自可免罪等語即遣伊湮
爾巴勃爾赤亞魯及額魯喇嘛前往官寨索諾木
等開過書信傳與各頭人閱看丹巴沃雜爾即說
若將七圖甲噶爾思甲布等獻出伊等豈肯無言
必將實情供出我們仍不能免罪這不過哄我們
的話索諾木彭楚克說母親大哥書子難道叫我

們出去受罪想是已替求恩典了土司頭人散後
索諾木彭楚克同甲爾瓦沃雜爾住在一房喇嘛
額魯夜間又去見伊二人據二人說前日原想要
跟大哥出去因為膽小遲疑未能去得如今我們
被頭人把持住了想不能與母親哥哥再見面說
畢痛哭第二日午刻忽然聽得官兵開礮各頭人
就將稟帖交與勃爾赤亞魯賚送出來臣等詳加
譯出原稟內稱我們兄弟五人已令長兄莎羅奔

出他自然備細稟求大人們轉求

大皇帝施恩准我土司兄弟仍在噶拉依居住算個頭人若是不准求把我們屍首留在噶拉依官寨等語伏思臣等初意所以從阿倉阿青等之請令其差人往諭逆酋兄弟者因是時大礮既難擡運且又路長山險連日大雪即趕辦鼓鑄尚須數日若於此際可以設法生致賊酋賊目方為全美是以從權辦理今賊酋等死亡在即猶為此狡獪之詞

冀延時日更屬可恨可惡看來索諾木兄弟本係庸懦無能頗有欲投之意只因從前賊酋等肆行不法原係賊目等為之主持今賊目等明知賊酋一出必盡歸罪于頭人伊等斷難倖逃誅磔因而從中挾制使其不能投出現在大礮先已鑄成一位轟打於本日復鑄成一位而臣明亮富德處亦各運到大礮各二尊來至噶拉依現已四面力摧若再鑄礮合轟不過數日間官寨即成齏粉臣等

察看情形設法辦理總期一併俘擒檻送

同日阿桂豐昇額明亮又奏言查湖廣官兵所有
前此派來之第二三起一千二百餘名可以酌撤
臣等即令總兵仁和帶領啟行至此後西北兩路
綠營兵內有多餘可撤者即隨時辦理不使壅積
滋費均奏入

上諭軍機大臣曰阿桂奏索諾木兄弟接到阿倉阿青
岡達克書信意已游移復為丹巴沃雜爾所阻而索

諾木彭楚克甲爾瓦沃雜爾二人因不能見其母兄
致相痛哭則其心已動目下自以儘力速攻為正策
使賊人膽落心驚可冀早為歲事至賊番所以相聚
堅拒不過欲使我久駐勞師糜費帑餉今阿桂等酌
將官兵可撤者陸續撤回使計徒施無益所辦甚堪
嘉尚自可望指日集勲惟是攻圍畧久恐賊人於我
營盤處所暗挖地道此事頗有關係不可不加意嚴
防再賊人每當窮蹙之時輒潛赴我營卡滋擾乃其

鬼域長技阿桂等並當飭諸將士一體留心防範不可稍疎

同日富勒渾郝碩奏言查三路大兵會合自應核定站程另行安設臣等親加查勘應即改由西里寨順溝行走自科斯果木至勒烏寨為一站由勒烏寨至西里寨為一站由西里寨至則朗噶克坡底為一站由則朗噶克至瑪爾古當噶為一站由瑪爾古當噶至軍營為一站共計五站比之由索

隆古山梁行走既屬省減而道路亦稍覺平易現已安設齊全趕運米石其索隆古各站尚須暫留數日以便兩路合供一俟新路暢行即行裁撤至北路自牛廠至獨松各站應先裁撤所裁官員人夫即可撥赴功噶爾拉一路添安更為便捷奏入報聞

乙未阿桂豐昇額明亮海蘭察額森特奏言查噶拉依左手寨落甚多前此大兵初到時雖經搶佔

焚燒而臣額森特現在駐兵圍困之處相距官寨
尚隔有大寨五處賊人猶死力拒守臣海蘭察駐
營之處由山腿迤邐而下亦尚有大石卡二座堵
禦臣等公同酌議左手五處寨落已漸轟打殘損
若能搶佔則移礮進轟官寨更為得力當於初七
初八日臣額森特派兵分攻而富德舒常處亦遣
兵從西南合力夾攻雖搶得一礮因其餘各寨均
在田礮之上賊人鎗石緊密佔據無益旋即拆毀

至從烏爾納營盤右手小山腿而下亦有賊卡二座初八日晚令烏爾納等帶兵攻得一卡接拏木柵運礮轟打第二卡相機搶佔臣海蘭察於初七日率同福康安烏什哈達瑚尼爾圖等分兵三道從左手山峯而下先將大石卡一座攻得其下山包上大石卡一座為賊人衛護取水之路尚復死守不去初九日復發兵攻得並搶獲火藥鎗刀甚多查此處與官寨更近已移礮往轟不但官寨勢

益窘迫而賊人取水更難臣等詢之投出各番據稱大礮打入之處兩三層高厚礮牆俱經穿透其被礮轟擊而死及因寨牆坍塌為石壓死者頗多現在索諾木不敢復住礮樓已於樓下第三層牆垣較厚之處躲避又因官寨立於石峯之上不能創害將口袋裝盛土石四面圍繞遮護查噶拉依層層圍困賊已逃死無門而偷生惜命復不能引決自裁現在三路所運大礮日漸增多晝夜轟摧

自可相機俘獲再番人等至此時始行出來已不
得謂之投順臣等除將婦女俱賞給出力土弁外
所有男番悉行殲戮即喇嘛班第並不稍為寬宥
奏入

上諭軍機大臣曰閱阿桂進到攻圍噶拉依情形圖內
官兵四面布圍固屬周妥惟舒常營盤尚在河西卡
倫之外似覺稍遠何不移至沿河卡邊用礮夾河轟
擊更當得力又烏爾納營盤東北之官兵營卡距賊

巢亦遠何不移過河溝於硃筆圈識處駐扎使礮轟賊寨更為切近其餘有應移近者並著將軍等照此妥酌辦理

同日阿桂豐昇額奏言自迷輸喇嘛色納木瓦爾丕投出之後又有堪布喇嘛色納木甲木燦及噶布珠雍中朋喇嘛隨同阿倉等投出此三喇嘛內惟堪布喇嘛內據番人供稱挾其邪術肆為咒詛並慫恿土司抗拒大兵情罪最為重大其迷輸喇

嘛雖未聞教唆土司頭人作為不法然係金川有
名之大喇嘛不應仍留番境而噶布珠雍中朋本
係德爾格忒喇嘛曾在綽斯甲布地方居住嗣經
金川請來念經留住雍中寺內亦無別項可惡情
節但伊所收徒弟即係金川之人自應一併解京
臣等遵奉

諭旨即派護軍叅領新達蘇等將此喇嘛三名及其徒
弟三名解赴京師再查甲壘土司一帶地方曾經

受戒稱為喇嘛者甚少今除此喇嘛三名外其徒
衆十餘名均係班第沙彌容臣等續行解赴成都
交與文綬令其即於成都喇嘛寺內安插以資管
束奏入報

聞

庚子阿桂豐昇額明亮海蘭察額森特奏言十三
日晚間索諾木彭楚克同大頭人達爾什桑卡爾
雅瑪朋阿庫魯來至寨外一併解到大營臣等詰

以索諾木及申爾瓦沃雜爾斯丹巴因何尚不自
縛來營請罪據索諾木彭楚克供我弟兄們原知
在寨內必死出來尚有一綫生路且知道我母親
哥哥並未害性命實在皆願出來但丹巴沃雜爾
阿木魯綽窩斯甲尼瑪噶喇克巴等恐我弟兄出
來說出實情俱必不能得活是以不許我們實在
不得自由十四日岡達克及索諾木彭楚克同懇
請差賞給翎頂之僧格爾結前往噶拉依官寨催

促出來賊酋等始稱定於次日出降及至十五日
又稱索諾木實因害病就是莎羅奔甲爾瓦沃雜
爾亦患痢疾不能出去等語查索諾木竄伏官寨
已成網魚置兔今雖節次俘獲岡達克索諾木彭
楚克兩人而索諾木終為頭人所制匿而不出官
兵深為切齒當即傳令四面開礮轟打不但日間
並未歇手即夜間亦乘月色環擊官寨牆垣孔穴
甚多賊人已不敢稍露踪影查臣海蘭察處因所

得右手石卡相距官寨甚近是以移礮往轟幾於發無不中惟臣額森特處因左手山腿第二石卡未得所用礮位尚不能如右手之得力但此第二石卡因有在後五寨為之聯絡賊人鎗礮環施是以攻而未得今臣等察看地形若使虛實並用抄截其後攻打其前亦不難奪獲現於日內奮力攻搶一得是卡則其下雖尚有石卡兩處亦易為力從此橫截而下不獨賊人五寨均攔截在外而移

礮以轟官寨更為切近奏入

上諭軍機大臣曰阿桂等奏索諾木彭楚克及大頭人達爾什桑卡爾雅瑪朋阿庫魯三人續經到營覽奏稍慰看來賊勢已極窮蹙今既四面用礮合轟自可尅期歲事至逆酋索諾木等始稱於十五日出降繼復托病不出甚為可惡阿桂等雖稱其為頭人所制每日遷延然逆酋當此危迫之時如果尚知畏懼亦何至不能自主即或丹巴沃雜爾等從中把持亦無

難將梗阻之人一併擒縛率衆速出請罪今仍詭語
遲延竟是索諾木稟性兇頑至死不變實堪切齒現
既用礮轟擊自即可削平賊巢諒此輩釜底游魂必
當同就擒獲檻解獻俘迅速集勲奏凱

癸卯阿桂豐昇額明亮奏言查三雜谷綽斯甲布
丹壩鄂克什木坪瓦寺霍爾綽窩各土司土舍俱
已不傳而至親自來營諸安賀喜而明正布拉克
底巴旺土司土舍亦續即前來內除綽斯甲布梭

磨卓克采從噶克四土司未經出痘布拉克底係
瘤子不能步履巴旺係土婦難以進京外餘如木
坪鄂克什丹壩各土司均已束裝預備綽斯甲布
三雜谷布拉克底巴旺亦派出土舍頭人預備隨
往無不歡欣但番人深畏內地炎熱今若令隨同
官兵於四月望前抵京其歸途正當五六月天時
炎熱倘有事故轉不免指為畏途其未來者亦恐
心生疑慮莫若俟至十一月初間令本省提督派

諳練之將領等由成都帶領起程於年前到京則
彼時正值入

覲之各蒙古及土爾扈特王公扎薩克併回城大小伯
克等俱集京師在各土司等得見王會輻輳既使
其益生震疊而輪班之王公伯克等又見各土司
新赴

闕廷益知無遠不服之盛於撫馭番衆似更有益奏入
上諭軍機大臣曰阿桂等奏各土司頭人於年前到京

入覲所見甚是其應行入覲之土司統俟阿桂辦理善後事宜時酌定如何分班照回部輪流入覲之例與外藩等同與朝正仍知會沿途督撫一體照料

乙巳富勒渾鄂寶顏希深奏言此時北路軍糧自應歸併西路但西路臺站亦係初安人夫甫集以之分運西營仍恐不足深恃臣等酌擬於北路尚未撤站之時先趕辦二千石運赴大營以資儲備即使西路撥運之米一時偶有不敷以之添補供

支更為有備無患其北路撤站後所有後路一帶官兵不日亦即調歸大營其未經調營以前尚需支食擬令甲雜以外駐防官兵在大營支領其甲雜以內者即在牛廠支領相去均未甚遠再查俄坡覺木交兩站前因接連南路米石是以留設茲該處存米業已運竣臺站亦經前後裁撤惟牛廠尚有存貯米石軍火等項臣等現飭站員運赴勒烏圍交收以便轉運大營將來如有餘存即留為

該處防兵之用所有牛廠一站亦可裁撤奏入報聞

己酉阿桂豐昇額明亮海蘭察額森特奏言二十
二日夜臣額森特等分兵三路令投番作為前隊
並派舒亮彰靄那木扎烏爾納各帶兵分攻賊寨
左手之兩寨賊人抵死拒守未能即克臣等公同
酌議賊寨東北有水溝一道從夾巴寨流出溝上
之寨名木工寨若從烏什哈達駐營之地順山腿

而下取木工碉寨拏柵佔據不但溝東山腿上兩
石卡死守無益而離官寨東門不過一箭之地移
礮往擊更為得力且噶拉依與得什科爾等寨相
通之路亦不能往來即於二十五日夜派烏什哈
達等帶領漢土官兵突前攻搶攀越而入將木工
碉寨攻克其附近石卡四座亦俱克取現在督令
兵丁趕拏木柵運礮轟摧而額森特等處現又從
扎木什克接拏木柵以斷東面各寨一經得手則

噶拉依賊寨更孤而臣等各站大礮又復晝夜轟擊自可尅期掃殄

同日阿桂豐昇額明亮又奏言綽窩土司彭楚克拉布坦於正月十五日親自來營並稱如各土司進京入

覲懇請隨同瞻仰

天顏查綽窩係霍爾部落距邊外較為寫遠自用兵以來該土司派出土兵於革布什咱一帶隨同官兵

駐守又派烏拉運送軍糧茲又懇求入

覲具見效順之忱現在擬派進京者均係甲壘土司今
綽窩土司首先自請實可今霍爾各部土司聞風
興起臣等業已賞給花翎俾衆共知鼓勵均奏入

上諭軍機大臣曰逆酋當此窮蹙之時尚敢負隅抗拒
實為可惡阿桂等惟當一意轟擊賊巢速期摧破毋
致羈延又阿桂奏綽窩土司彭楚克拉布坦願隨各
土司入覲番衆之性不耐炎熱所有輪班入覲之土

司等已許其十一月起身於歲內到京綽窩土司亦應一例妥辦

同日阿桂豐昇額明亮又奏言據賊酋令頭人阿木魯綽窩斯甲將逆酋張坤忠送出查此時務在剋日洗蕩賊巢即索諾木兄弟中再有一二人出來亦尚不得完事今僅將張坤忠獻出於事仍屬無關緊要至張坤忠係應送京要犯茲派出副將普吉保等解赴京城奏入

上諭軍機大臣曰張坤忠以內地兵丁甘心投降賊番
為之助惡自應解赴行在嚴審治罪著傳諭文綬即
速檄飭川省委員沿途小心管解遄程行走

甲寅阿桂豐昇額明亮奏言臣等督率各路官兵
將噶拉依賊寨四面設卡掘濠擊柵轟礮合力圍
攻其官寨均經摧塌官寨外各寨落又經節次攻
取惟餘扎木什克寨尚在死力拒守臣等督令官
兵攻打益加緊急賊酋惶窘無計初三日令其心腹

頭人拉布咱僧格來營乞命而拉布咱僧格亦自
懇恩投降免死臣等令投番侍衛穆塔爾密諭以
汝等必當有自効出力之處方能免罪拉布咱僧
格去後臣等旋令官兵預備候至未刻扎木什克
及各卡賊衆情形稍覺散亂臣海蘭察額森持均
即帶兵直下臣富德舒亮亦帶兵過河各寨賊人
望見兵威壯盛出寨跪降其餘抗拒者皆被官兵
殲獲所有扎木什克及山腿上卡座暨緊貼官寨

西北一面散寨均經官兵佔據並將官寨東山溝取水之處佔住截斷是晚各領隊帶兵齊至官寨牆下四面圍定賊人仍於寨內徹夜叫稱索諾木明日出降至初四日早索諾木跪捧印信帶同伊兄弟莎羅奔甲爾瓦沃雜爾斯丹巴伊妻布拉克底土女章谷土女並大頭人丹巴沃雜爾阿木魯綽富斯甲尼瑪噶喇克巴並都角喇嘛聶鼉喇嘛及大小頭目男婦老幼二千餘人出寨乞免誅戮臣等派領隊大臣舒亮保寧官達色巴克坦布等將官寨嚴行

看守另行派員查點外其帶出之番衆二千餘名
亦派令幹練鎮將分別查明辦理伏查金川賊酋
窮兇極惡久為西南邊外之患實屬神人共憤今
其全家母子兄弟悉就俘擒而助惡著名之大頭
人亦概行擒獲無一遁逃藏匿非但漢土官兵驚
喜懽呼咸謂出於意外即臣等前此亦未敢必其
全數生擒此皆仰賴

皇上威福上邀

天佑是以歲功完善至於如此謹將攻克賊巢俘擒賊酋之處恭馳露布以

聞奏入

上諭內閣曰將軍阿桂等奏報攻克噶拉依賊巢全境蕩平俘馘同獻紅旗於二月初四日自軍營馳發今於二月十三日未時遞至桃花寺行在沿途僅行八日實為迅速所有賫遞紅旂之兵部員外郎六十五著賞戴花翎其辦理臺站馳遞文武各員均屬可嘉

著該部查明同兵部捷報章京各員一併議叙並先行賞給緞疋其各站差弁兵夫並著該部查明照例議賞

同日

上諭軍機大臣曰今日正當祇謁

東陵告成回桃花寺駐蹕適阿桂等所奏紅旗遞到此實仰賴

皇祖默佑是以捷報不期而至朕回鑾至圓明園即啓程

展謁

西陵禮成恭奉

皇太后巡幸山東告成

闕里計四月二十六日至黃新莊於二十七日舉行郊
勞大典著傳諭阿桂令其約計程期在軍營起身與
豐昇額海蘭察額森特福康安普爾普等同來至明
亮已授為該處將軍毋庸來京並著阿桂於富德舒
常內酌留一人同明亮辦事其餘領隊大臣侍衛等

應帶何人同來應留何人分帶後隊凱旋兵丁並著
阿桂酌定此次平定金川實皆阿桂一人功績深堪
嘉尚茲班師在邇特解親御黑狐腿黃馬褂先行隨
報賞賜

臣等謹案金川逆酋背

恩踵逆肆虐鄰封惡積禍盈罪難擢數我

皇上赫斯聲討

天戈所指美諾先平嗣復

簡搜勁旅犄角攻心分途並進又先後

敕發帑金數千萬以供軍實凡攻討機宜一切斷自宸
衷軍情萬里悉在目前加以

懋賞屢頒微功必錄俾揚敵愾而勵攻堅臣阿桂等

仰藉

天威稟承

廟畧遂得頻摧碉卡直搗賊巢勒烏圍先經洗蕩噶拉

依繼就掃犁全境敕寧罪人悉得獻俘

闕下

郊勞

告功在楊

光

烈用對

天

休

且

等

葛勝

踴躍

懼

之

至

平定兩金川方畧卷一百三十二